



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :



Tir Yimyim



tir_yimyim



tir yimyim

TAPAK 7

NIA-i Tahawwur Rana dang
asüngdangya tenzüko

US envoy Witkoff-i
Russia Tir Putin ajuru

VOL. XXII ISSUE NO. 179 (ADOK 179)

DIMAPUR

AMUNGNÜ SUNDAY

RONGCHII (APRIL) 13, 2025

₹ 5.00

PM-JAY Ayushman/CMHIS contract agiener: NPDA

Dimapur, Rongchii/April 12 (TYO): Nagaland Private Doctors' Association (NPDA) ajanga April 11, 2025 nü Chief Secretary, Government of Nagaland dangi PM-JAY Ayushman aser CMHIS schemes atema contract zülutepa aliba agiener ta shiti ka zülüogo.

Onoki CEO, NHPS dang March 17, 2025 nü metetdaksüba ama private Empanelled Health Care Providers (EHCPs) nem tagütsütsü aliba sen maneni magütsüba ajanga ita ka tsüngta PM-JAY Ayushman aser CMHIS schemes nung shilem agiba anentsü osang ya agütsütsüsa akumer, ta NPDA ajanga ashi. Iba inyakyim ta April 17, 2025 nü nungi kongshitsü.

Onoki aiben iba khuret lemsatepaka, iba tebilemtsü kasa dang lir. Onoki NHPS Office aser Commissioner & Secretary, Health and Family Welfare den April 9, 2025 nü iba indang kanga junga jembishinuogo aser iba mapang Government of Nagaland-i EHCPs nem tagütsütsü aliba sen agütsütsü

atema contingency fund tenzüko nung ajungsü ta shidanga liasü. Ibaji ajanga onoki Nagaland nung aliba nüburtem nem timtem majurui tongtipang services agütsütsü liasü, ta ashi.

Ajisüaka mapang talangka nungi onok tangutsü mongui item scheme kübok services maneni agütsütsü tamakoktsü kumogo. Senotsü tsütsü tanen makai tetsükdaksü ajuruba ajanga ozü establishment takum süa alitsü kanga saka kumogo aser iba melena lenmang danga kar bushitsü kecha maka, anungji tekeraba nung metongshitepba mera magira onok iba schemes nungi ainshitsüsa akumer, ta NPDA tir Dr. Lima Imchen aser tongti zülur Dr. Mhasiseno Belho nati iba shiti nung ashi.

Sorkari iba tensa angateta EHCPs yaritsü asoshi tekeraba nung mera agütsü onok teimla lir. Onok kodanga iba scheme nungi atsüngintsü tebilemba meliasü, saka indang indanga aser tim yimya nung healthcare maneni agütsütsü tangatetba nung lir, ta NPDA ajanga ashi.

Kohima Transmission Division kübok arem chidoktsü anogo melenshir

Dimapur, Rongchii/April 12 (TYO): Menügdakba nung timtem majurutsü aser power supply shidak agütsütsü mechi Kohima Transmission Division kübok 66kV & 132kV Transmission lines indang arem chidoktsü aser anepalutsü atema Executive Engineer, Transmission Division, Kohima ajanga taoba mapang sangdonga aliba anogo tera melenshir, ta Er. Namheu Khate Zelaing, Executive Engineer, Transmission Division, Kohima ajanga sangdong ka nung metetdaksü.

Iba dak sendakba nung item mepaidoktetba maparen inyaktüsü

asoshi agüja aliba anogoshia anepdang 8:00 ako nungi nikongdang 3:00 ako tashi total shutdown of power alitsü.

Total shutdown ya 66k V Kiphire-Tuensang nung April 15-19, 2025 anogotem alitsü sangdonga liasü saka melenshir April 25-30, 205 anogotem alitsü aser iba mapang Kiphire, Meluri aser Phek districts shilem kar aser LHEP nung blackout alitsü.

Anungji iba maparen agi kongshiba tesem nung consumers aser nüburtem dang amalitep akatsü aser timtem arema atatsü ayongzüker, ta sangdong ajangasa ashi.

Maikum nung nisung tepsetba ASTC-i aitsür

Dimapur, Rongchii/April 12 (TYO): Mejangjaba tazü nisung temi Maikum yimtsüng nung April 7, 2025 nü meranga inyakba aser temeim agi sünga aliba tetsü Kensutlungle (Chubatemsu kinungtsü) tepsetba ajanga mulungsentsü shidak aliba nüburtem asükjang morongdaksür, ta Ao Senso Telongjem Chümoukedima sangdong ka ajanga ashi.

Tai maket takum ka yamaji samatsüba ya tepang agi rasaa meshiteter aser civil society temi magizüktettsü. Iba osang angazükba mapang nungi Ao Senso Telongjem Chümoukedima, Ao Lanur Telongjem Chümoukedima ajanga mangyimer

kibong aser kinungertem den yaritepa arur aser ozüing amshirtemi aibelener mapu tashi akokba lenmang nung maneni yariteptsü.

Ao Senso Telongjem, Watsu Telongjem Chümoukedima aser Ao Lanur Telongjem Chümoukedima-i Nagaland Police dak temulung lema lir aser maneni asür Kensutlungle dak tim masüba mapa inyaker tepseta yutsür tekeratiba nung pua tapet temerenshi agütsütsü mepishir, ta sangdong ajanga ashi.

Onok mangyimer kibong aser kinunger den bendanga agütsür nokdaksü aser nisung tepset mapu tashi ozüing amshir den shisatsü agi yariteptsü, ta ASTC sangdong ajangasa ashi.

Nagaland nung Govt College tasen 4 lapoktsü



Rongchii (April) 12, 2025 anogo nung Dimapur Govt College nung principal Prof. Sanjay Sharma den tepila sentong aliba mapang Nagaland Higher Education & Tourism minister, Wb.Temjen Imna Along ajanga DGC purtemi nungo sempet agütsüba noksa nung angur.

Dimapur , April 12 (TYO) : Taklm kümsa Nagaland nung Govt college tasen 4 lapoktsü aser item college-tem nung inyaktüsü atema tesayur aika nüngdaksü, anungji zünger temsüa alir lanurtem item mapa asoshi renemang ta Nagaland Higher Education & Tourism minister, Wb. Temjen Imna Alongi metetdaksü.

Pai iba o ya tanü yangi Dimapur Govt College nung principal Prof. Sanjay Sharma den tepila sentong nung jembidang metetdaksü.

Tang Govt college-tem nung tesayurtem shimokba kuli ka ashi dang, item tesayurtemi küm aika bendanga agüja sayua aruogo. anungji parnok nem yimli ka aglja shimogo, saka Ph D agia malirtem klm 5 tsüngda renema adoktsüla

ta paisa ashi.

Paisa taküm nungi Dimapur Govt College nung Science subject karbo sayu tenzüktü ta metetdaksü. Item Science subject-temji Maths, Physics and Computer Science tem alitsü .

Tanü iiba sentong nung tesayurtem, Alumni Telongjem, kaketshirtem aser tsraburtemi Prof. Sanjay Sharma , principal den tepila o jembidang , pa arur külen college kiojen aser class takdangtem tajungba klmogo aser pai kanga ochishia aser nendaka inyakogo ta shia tenlängsang agütsü.

Prof . Sanjay Sharma ya Science tesayur ka lir aser pa Kohima Science College nung klm 20 inyaker , 2022 küm August ita nungi Dimapur Govt College nung principal inyak tenzüko. Pa

shitakbabo yaküm küm mapa nungi anentsüba liasü saka nngdak reprangtetba agi government-i pa ita ishika tali inyakdaksür taoba ita nung anen.

Tanü iba sentong nung pai tepila o jembidang , pa mapang tatsüka inyakdang tesayurtem, kaketshirtem aser pa den külem office nung inyaktertemi yaritepba ajanga mapa aika takok ngua inyakogo ta pelaba metetdaksü.

Paisa tesayurtem dang shisaliok tasen bushiloka aotsü aser itemji osang kakettertem nung lemsateptsü nüngdakba o ka lemsatep.

Tanü pa den tepila sentong nung kaketshir aser tesayurtemi ken tajung tena tenlängsang aser temoatsü agütsü aser tatem nung tesayur Lily Rinoi pa asoshi sarasademja sentong atem.

EVMs ya internet mesüra Wi-Fi nung sendaktepa mali: ECI

Dimapur, Rongchii/April 12 (TYO): US Director of Intelligence, Tulsi Gabbard-i United States nung amshiba electronic voting systems (EVS) ya hack asütsü mela-melar ta tebilemtsü lemsatepba langzüa, India nung amshiba Electronic Voting Machines (EVMs) ya tongmelang, shidak aser teindang calculators lir ta Election Commission of India (ECI) ajanga Hokulbarnü ashi, ta Deputy Electoral Officer, Nagaland, Alila Chang-i sangdong ka ajanga ashi.

US Tir Donald Trump-i April 10, 2025 nü Cabinet senden ka ayongzüka nung, item electronic voting systems ya hackers temi hack asütsü aser

vote agütsür aliba ya mashi lenmang nung amshitsü mela-melar ta Intelligence department ajanga kuli ngutet ta Gabbard-i shia liasü.

US elections nung voters temi tamang akatsü mechi linük tesem ajunga nung paper ballots amshitsü ashi, ta Gabbard-i ashi.

Linük kar nung Electronic Voting Systems amshir, kong systems balala, machines aser internet amala densema private networks balala meyoktepa amshir, ta ECI ajanga Hokulbarnü ashi.

Ajisüaka India-i amshiba Electronic Voting Machines ya tongmelang, shidak aser teindang calculators lir aser Internet, Wi-Fi mesüra Infrared den

sendakteptsü makoker.

Item machine ya Supreme Court of India ajanga kanga junga tendangogo aser polling metenzükdang Mock Polls agiba densema Political Party temi jenjang balala nung tendangogo.

VVPAT slips crore pongu (5) dak tema tendangogo aser election nung toktepa candidate jakdang azüingdang putepa liasü. Vote crores 100 junga azüingtsü asüyonga anogo ka majungdang renemteter aser item machines ya shingaia tamper mesütettsü, koba strong room nung rizünga ayur mesüra temelaba agüja aliba nisungtemi ayur ta osang ajanga ajanga ashi, ta Deputy Chief Electoral Officer, Nagaland sangdong ajangasa ashi.

MDTOA-i benoka aliba ken o kanga junga bushisüngdangtsü akhanger: MCCI

Dimapur, Rongchii/April 12 (TYO): Tawa Mokokchung

Police ajanga truck ka (registration number NL 02 Q 6311) nungi yi apuba aser iba inyakyim nung shilem agia lir ta tai tonglokja nisung ana apuba indang osang kaket nung züngshiogo, ta Mokokchung Chamber of Commerce & Industry (MCCI) sangdong ka

ajanga ashi.

Police temi iba truck indang driver aser ozüing alema bena aliba yi indang kibur Dev Raj aser ano Mahesh Siyag pua lir, aser ano iba ken o nung truck kibur ya dena lir ta osangtem ajanga ashir.

Mokokchung District Truck Owners Association ajanga iba ken o nung shilem agia aliba truck kibur Mohan Ram Bhadu anema

mera agitsü takangba agüja lir ta osangtem ajanga ashir, shiba police ajanga mezüing osang agütsüba nungbo dena meliasü.

Anungji MDTOA ajanga benokba ken o asadanger kanga junga bushisüngdanga nüburtem ratamata aliba ajunga jangjatsütsü aser ochi obendang agüja iba ken o tatem kati arutsü ajungshir, ta MCCI sangdong ajangasa ashi.

TPDU-i ayongzüka ango apuba sentong agi



April 12 nü Tsungiki & Philimi Doyang union tenteter küm 25 ajungba nüngdem nung Doyang ayong tzüküm nung Jandong ezhu/ Tsutsuye nung lokti angopuba sentong ayongzüka agiba noksa nung angur.

Dimapur, Rongchii/April 12 (TYO): Tsungiki-Philimi Doyang Union (TPDU)-i ayongzüka April 12 nü Doyang ayong tzüküm nung Jandong Ezhu/Tsutsuye nung 25buba Tsungiki-Philimi Doyang Union Community Fishing sentong agiogo.

Iba sentong ya Wokha district nung Tsungiki yimtsüng aser Zunheboto district nung Philimi yimtsüng nati ayongzüka liasü aser iba ajanga lokti angopuba takar sobaliba sayur, koba aso ka dak tema beshia arudar.

Tsungiki-Philimi Doyang Union (TPDU) ya 2000 küm officially tentet aser iba yagi kin ana tsüngda sobaliba inyakyimtem wazüka ayuba nung tongtumbang shilem agia arudar.

Sentong nung Secretary of the Nagaland Government Register Class 1 Contractor Union (NGRC-1 CU), Abel P.

Shohe alakteta jaoker liasü. O jembiba mapang pai, lokti angopuba sentong ajungketba atema TPDU lenirtem nem tenünsang agüja liasü. Paisa, iba sentong ajanga koda yimtsüng ana yongtsü nung dang masü saka kidanger lokti den tesendaktep akangshir iba indang lemsatep.

Shohe-isa, kümtem tsüngda sorkar department balalai teyari agütsüba atema pelaba lemsatepa liasü.

Pai, sobaliba libaliro aser inyakyim ajungketba nung teyari agütsüba atema Department of Tourism, Information aser Public Relations and Arts and Culture na nem mejeta tenünsang agüja liasü. Maneni pai Naga nunger tanga kintem danga iba ama sobaliba melentepba sentongtem ayongzüka agitsü ajungshia liasü.

Sentong ya TPDU mendenbuba Hokiye Assumi-i lokti pela agizükba o jembiba

sülen tenzük. Sentong nung shilem ka ama taoba mapang Union mendenpur aser General Secretary tem nem tetushi agüja liasü.

Tsungiki-Philimi Community Fishing indang puti otsü yimtsüng ana pronglai nungi lenirtemi lemsatep. Vilhozu Wotsa aser Tsenyimthung Kikon nati iba inyakyim koda tenzük inyakyonga aru iba indang lemsatepa liasü.

Sentong ya TPDU Secretary, W. Wojanthung-i tepela o jembir tembanga liasü. Pai iba benjungmung takok asoshi teyari agütsürtem sentong nung shilem agirtem dang kanga pelaba lemsatepa liasü.

Maneni sentong nung Trio-Thunglamo, Bubu aser Nohonu nungeri special presentation agüja liasü. Sentong nung yimtsüng anaprongla nungi nisung meyirejang aikati shilem agiogo.


DGC Principal den tepila sentong agi

Dimapur, Rongchii/April 12 (TYO): April 12 nü Dimapur Government College Principal, Prof. Sanjay Sharma den tepila sentong DGC Central Library nung agiogo.

College-i ayongzüka tepila sentong nung faculty, staff aser kaketshirtemi mapa nungi anenba Principal nem tetushi agüja liasü. Sentong nungsa Minister of Higher Education and Tourism, Government of Nagaland, Alumni Association aser DGC Parent Teacher Association nungeri shilem agia liasü.

Sentong nung tesayur, non-teaching staff, Alumni, Parent Teacher Associations, Students' Council aser college nung unit balalai o tatsütsü jembiba aser parnok ajaki Prof. Sharma-i pa indang career nung bendanga agüja inyakba aser lokti ajangzüksü atema teyari balala agütsüba, aser talisa DGC Principal inyakba mapang pa mapa tajungtem indang lemsatepa liasü.

DGC indang IQAC Cordinator Dr. Vinyuhu Lhoungu-i, pa lenisüba nung takok balala anguba aser project balala benoka inyakba indang lemsatep, aser DGC ya



Prof. Sanjay Sharma

state nung premier institute ka kümdaktsüba atema pelaba lemsatepa liasü.

Kasa mapang nung Minister for Higher Education Temjen Imna Along-i Prof. Sanjay Sharma nem tenünsang agütsü aser Nagaland atema pa mapa tajung asoshi pelaba lemsatepa liasü.

Tepila o jembiba mapang Prof. Sharma-i, DGC kibong dang pa asoshi sentong tajung ayongzüka katsüba atema pelaba lemsatepba den lenla kar nung college renloka aotsü atema lenmang sadema lapoka alibatem indang lemsatepa liasü.

Pfutsero aser Medziphema nung Seri-Tourism Model Farming Centre lapokogo



Dimapur, Rongchii/April 12 (TYO): Advisor, Sericulture & Minority Affairs Imkongmar-i April 11 nü Pfutsero aser Medziphema nung Seri-Tourism model Farming Centre lapoktsüogo.

Nüburtem nem Silk yangluba tasa agütsütsü nükjidong nung department-i iba sentong ya benoka inyakogo.

Iba centre ajanga state adena or tangalen nungi silk enthusiast alima penzürtem atsüa arutsü. Maneni school aser college

kaketshirtemi centre semdanga silk indang angazüktsü, koba parnok tarutsü career atema tangazükba ka asütsü.

Nüburtem rongsenketzüng jenjang ajungkettsütsü atema yimdak yimtsüng nung alirtem asoshi department-i technical skill training programme balala ayongzüka katsütsü.

Advisor-i nüburtem dang Silk production dak sendakba nung tangazükba balala aktsü atema item centre tem takok tashi amshitsü ajungshia liasü.

Longleng Station Superintendent-i metetdaksür

Dimapur, Rongchii/April 12 (TYO): Longleng Station Superintendent-i sangdong ka ajanga nüburtem dang passenger tem anisüngzük atema April 14 nü nungi tenzuka NST Bus Night Service jila toktsür aoba mapang melenshiba metetdaksüogo.

Mapanglem:
(1). Lemluwa - April nungi

September - Timing 5:00 PM.

(2). Asükwä - October nungi March - Timing 4:00 PM.

Passenger tem dang mapanglem ta temulungdang ayutsü aser service kecha tetsükdaktsü maka inyakshitsü atema ketdangsürtem tetuyuba sülen tashi anga anidaktsü metetdaksüogo.

Zeme Baptist Church Kohima nung cutting & tailoring training agi

Dimapur, Rongchii/April 12 (TYO): April 12 nü Zeme Baptist church Midland Kohima nung 'Beautiful things come together one stitch at a time' omen dak ajemdaker anogo ka atema cutting & tailoring training sentong ka agiogo.

Training nung shisalen sayurtemji Remphano Hemang aser Bangdwa Elunglung (Bstudio Boutique) na liasü. Sentong nung shisalen sayurtemi sü mejeptsü, artsü

tasa den ajem agi sü artsü tasatem sayua liasü.

Workshop nung apron mejeptsü aser artsü, pyjama set yangluba aser pillow covers mejepa arba amala sayua liasü.

Sentong tetenzüki Women Department ZBCK tir Angaule Nsarangbe-i Tsüngrem temaotsü meshizüka sarasadem aser iba workshop ayongzüka agiba ya koda tongtumbang iba indang lemsatepa liasü.

Tepela anküp o jembiba

mapang Chiro Liegise-i sentong ayonger, shisalen sayur aser sentong nung shilem agir ajak dang kanga pelaba lemsatepa liasü.

Iba sentong ya Women Department Zeme Baptist Church Kohima-i ayongzüka agi, kong tetstür 28-i shilem agia liasü. Sentong ayongertemisa taruba kümtem nunga iba amala sentong ayongzüka agia tetsürtem parnok tasa arangtetshitsü atema ajungmesotsü imlaba lemsatepogo.

Mokokchung nung photography workshop agi



Shisalen sayur den shilem agia adener aser MPC züngsemtem külemi tangokba noksa nung angur. Mokokchung, 11th April, 2025 (Photo: Mokokchung Photography Club)

Mokokchung, 11th April (TYO): Canon India aküm nung Mokokchung Photography Club den külem sür Mokokchung Town Baptist Arogo (MTBA) Youth Department-i mezüngbuba photography workshop sentong ka MTBA conference hall nung ayongzüka kaogo. Iba sentong nung shilem agia adener parnok 40 shi liasü.

Iba sentong nung shisalen sayurtemji - Ashwini Barkataki (Mentor - Canon) Jorhat Assam, Bondeep Khaund (SSO, Canon Technical) aser Subhajit Baral (Senior Territory Manager, Canon India) par asem liasü. Shisalen sayurtemi camera aser photography dak sentakba nung temetetsü onük balala (theory) rateta ashiba den noksa/video koda tangoker ta

asüba nung practical dena tasa balala sayua liasü.

Iba workshop nung adener ajak nem Mokokchung Photography Club ajanga kulikaket kaka agütsü. Iba workshop omenji "wedding photography & videography" dak rangloker agi. Iba sentong nung Mokokchung Photography Club nungi senior member-tema kar arua shilem agia aden.

Bengal nung Waqf Act anema longkakait; nisung asem süogo

Kolkata, Rongchii/April 12 (Agencies): Honibarnü West Bengal kübok Muslim nütsüung aika aliba Murshidabad district nung Waqf (Amendment) Act anema longkakait aser iba Act dak sendakba nung nisung asem asü aser nisung 100 dak tali puogo.

Trinamool Congress tongti aser Chief Minister Mamata Banerjee-i, Bengal nungbo iba ozüung mebenoktsü, ta sangdong.

Tawa Parliament House anaprong nung Waqf bill atema o lemtepa iba bill agizükba sülen linük Tiri sign süa iba bill ya ozüung kümogo.

Iba ozüung agizükba sülen linük tesem balala nung yimtenren party tem, yimsü dak sendakba organizations aser lokti tentet aikati iba Act anema ola adoker.

West Bengal kübok Murshidabad district nung iba Act anema longkakaita rara adok aser tebu o par jabaso na par kidang tepset. Jafrabad kiyong nung kari par kidang nungjagi auyaba sülen tebu o par jabaso na kotari agi tsüngset.

Ano tanga tatalokba ka nung, Dhulian, Samserganj nunga nisung ka khaset. Hokolbar nungi tenzüka Samserganj aser Suti area na nung iba Act anema longkakait sashia aiter.

Tensa raksaba dak sendakba nung tang tashi nung police-i nisung 118 puogo.

Chief Minister Mamata-i X ajanga, "Onoki iba ozüung ya meyanglu. Iba ozüung ya Centre-i benok, anungji kechiba rarar?" ta asüngdang.

Laisa, "Onoki rara tapu ajak pu-masemer, ni yimsü balala amanger ajak dang süngjema alitsü aser azüoktsü mepishir," ta metetdaksü.

Hokolbar aonunga longkakaitertem nokdangtsü atema police-i injang khadokba mapang nung nisung ana yiruogo. Malda, South 24 Parganas aser Hooghly district tem nung longkakaitertemi gari aika rongdoktsü, lenmang mokdang aser police dak lung agi aon.

Murshidabad kübok Suti kiyong nung longkakaitertemi police gari densema gari aika rongdoktsü aser security sepaitem dak lung onloksü.

"Murshidabad district nung tenokdangba aika benokogo aser rara adokba tesemtem nung internet services shibangtsüogo," ta police ketdangser kati metetdaksü.

"Rara adokba dak sendakba nung Suti kiyong nung nisung 70 apu aser Samserganj kiyong nung nisung 41 puogo," ta paisa metetdaksü.

Social media nung prokba olulu mamangtsüla, ta mepishia pai, "Suti aser Samserganj na nung patrolling tenzüokogo. Tesem kecha nunga nisung adenshitsü memelar. Tensa raksatsü atema shinga nem-a temelaba magütsütsü," ta metetdaksü.

Ano külen item tatalokba dak sendakba nung BJP-i Trinamool Congress aitsüba den külemi NIA nem item tatalokba bushisüngdangdaksütsü takhangba agütsü.

BJP MP, Sudhanshu Trivedi-

i, "Linük temzüng dak sendakba inyakyim shidak benshia Waqf Bill ya Parliament nung benok, Joint Parliamentary Committee-i reprangshi aser Parliament House anaprongla nung agizük. Iba sülen Tiria agizüka iba bill ya ozüung aküm. Ajisüaka kari iba ya yimtenren nung tajangzüik angutsü atema amshir. West Bengal nung dang ya atalokba ya tejashitsüka lir. Mamata Banerjee politics ya linük atema amokmeren ka asü, ta shisadangtsüsa akümer," ta metetdaksü.

Ano külen West Bengal nung Opposition lenir, Suvendu Adhikari-i Calcutta High Court dang Bengal nung central sepaitem lemozüksütsü atema mepishi.

Suvendu-i, "West Bengal nung yimsü balala amangertem raraba tamajungba akümer, anungji ni state sorkar dang central paramilitary sepaitem meshizüksü atema mepishia liasü. Ajisüaka state sorkari kecha meinyakba agi ni High Court dang tiyongtsüi aita inyaksü mepishir. Kü temepishiba agizükogo aser division bench kati temepishiba ken oji angadangtsü," ta metetdaksü.

Adhikari-isa shidi ajanga railway minister dang Murshidabad nung longkakaitertemi railway raksatsüba tatalokba bushisüngdangtsü atema NIA nem agüjang ta mepishiogo.

Pai X ajanga, "Iba ya longkakaitba masü ajisüaka democracy aser yimsüsüba anema inyakba lir," ta metetdaksü.

NIA-i Tahawwur Rana dang asüngdangya tenzüokogo

New Delhi, April 12 (Agencies): 2008 küm kiralongrartemi Mumbai amakba nung asalentong yanglur tongti, Tahawwur Rana US nungi India tonga anir aruba sülen NIA-i pa dang asüngdangya tenzüokogo.

NIA-i Tahawwur Rana dang Mumbai amaksü atema külemi asalentong yanglurtem dak sendakba asüngdangyar, ta ketdangsertemi metetdaksü.

Hokolbarnü Delhi nung special court kati anogo 18 atema NIA nem Rana agütsüba sülen nungi National Investigation Agency (NIA) aser tanga intelligence agencies-i pa dang asüngdangya tenzüka

liasü.

Hokolbar nep 2:00 ako meta court-i tetuyuba agütsüba sülen Rana NIA headquarters-i anir ao aser mapang tatsüka anisüngzükdakja liasü.

Mumbai amaksü atema 2006 küm asalentong yangluba mapang nung David Coleman Headley Pakistan-i oa LeT lenirtem ajurua liasü. Iba sülen Mumbai nung Taj Mahal hotel densema tesem balala video tangoktsü atema pa nem tetuyuba agüja liasü, ta NIA-i metetdaksü.

Pakistan nung amenoka aliba kiralongrartemi tuyuba ama 2006 küm September ita nung Headley-i 2006 India semdanga

video tangoka liasü. Iba mapang nungji Rana tetuyuba nung nisung kati Headley anenzüksü atema anepaluja liasü.

Mumbai, Agra, Ahmedabad aser Cochin yimtitem nung Rana-i ajuruba nisungtem aser pai semdangba tesemtem jangjatsü atema NIA-i pa item yimti jagi anir aotsü.

Rana-i David Coleman Headley, kiralongrar telok Lashkar-e-Taiba (LeT) aser Harkat-ul-Jihadi Islami (HUJI) den asalentong yanglua 2008 küm kiralongrar 10-i Mumbai amak.

2008 küm kiralongrartemi Mumbai amakdang nisung 166 asü aser nisung 238 yirua liasü.

MULUNG NEN O



15:01: 1939 - 05:04:2025

Temeim Ojala **Late Mokoksangla Ozüküm** (Süngratsü), shirangba aser asüba mapang nung, Arogo aser lokti tentet balala den kija aser kibong kwinangkati sarasadem, rongsen, nübo aser shisatsü agi onok nungita yariogo, ajak dang kanga pelaba metetdaksür. Asen Teyanglur Tsüngremi nenok ajak moatsütsü onok tamang aser sarasadem.

Kanga pelar.

~ Chirnurtem, semchirtem, anükapang aser kinüngertem.



April 12, 2025 nü Chennai nung Union Minister G Kishan Reddy, BJP National General Secretary Tarun Chugh, Tamil Nadu BJP Tir K Annamalai, tatong Tir Nainar Nagendran aser party lenir Arvind Menon nung senden ka amenba sülen tangokba noksa nung angur.

Odisha nunga Ayushman Bharat scheme tenzüokogo

Bhubaneswar, April 12 (Agencies): Union Health Minister, J.P. Nadda-i Odisha state nunga Ayushman Bharat Pradhan Mantri Jan Arogya Yojana (AB-PMJAY) scheme tenzüksüogo.

Paisa, kobi melii West Bengal nunga iba scheme tenzüksü, ta metetdaksü.

Odisha, Delhi aser West Bengal state sorkartemi iba scheme anema liasü, ajisüaka Odisha aser Delhi na nung BJP sorkar aruba sülen state anaprong nung iba scheme tenzüokogo.

Joko iba scheme mebenokba state ji West Bengal dang lir.

Odisha nung Ayushman Bharat scheme ya Odisha state sorkar indang health scheme, Gopabandhu Jan Arogya Yojana (GJAY) den külemi benoktsü.

Ayushman Bharat scheme tenzüksüba sentong nung JP Nadda-i Ayushman Bharat Unified Card lema agütsü; iba card kübok nüburtemi Ayushman Bharat Pradhan Mantri Jan Arogya Yojana (AB-PMJAY) aser state sorkar indang Gopabandhu Jan Arogya Yojana naprongla ajanga tajangzüik angutsü.

Taoba mapang Odisha Chief Minister, Naveen Patnaik-i aniba sorkari Ayushman Bharat scheme ya anema liasü, ajisüaka Mohan Majhi-i aniba sorkar tentetba sülen Biju Swasthya Kalyan Yojana melen

Gopabandhu Jan Arogya Yojana scheme tenzüik.

Taoba Lok Sabha election atema nüboyimba mapang nunga state nung Ayushman Bharat scheme ya kanga tongtibang onük ka liasü.

Ato kilonser Narendra Modi aser Union minister J.P. Nadda na densema BJP lenirtemi, Odisha nung iba scheme mebenokba atema Naveen Patnaik-i aniba sorkar aija liasü.

BJP lenirtemisa, Odisha nung BJP sorkar aruba sülen parnoki Ayushman Bharat scheme benoktsü, ta nangzüka liasü.

Cuttack nung iba scheme tenzüksüba sentong nung jembidang Nadda-i, "Iba scheme ya 2018 küm Ato kilonser Modi-i Ranchi nung tenzüka liasü. Iba mapang nungji ni Naveen danga iba scheme benoka inyaksü asüngdang, ajisüaka Naveen-i magizük," ta ashi.

"Onoki Kejriwal danga Delhi nung iba scheme benoktsü asüngdang saka paia magizük. Delhi nunga nüburtemi telangzüba agütsüogo," ta pai metetdaksü.

Odisha nung iba scheme tenzüksüba sentong nungji deputy chief minister ana- K.V. Singh Deo aser Pravati Parida na den Odisha health minister Mukesh Mahaling, Kendrapara MP Baijayant Panda, Cuttack MP Bhartruhari Mahtab aser BJP lenirtem aika densema liasü.



April 12, 2025 nü Raigad Fort nung Union Home Minister, Amit Shah, Maharashtra Chief Minister Devendra Fadnavis aser Deputy Chief Minister, Eknath Shinde nungeri Chhatrapati Shivaji Maharaj nem akhüm agütsüba sülen tangokba noksa nung angur.



TIR YIMYIM YIMOBILEM (EDITORIAL)

DIMAPUR SUNDAY, APRIL (RONGCHII) 13, 2025

Ahsang Mong

Tanü amongba amongnü dang ya English agi 'Palm Sunday' ta ajar. Tang tashi nung Palm Sunday ta asüba ya asen oshi nung amshia mangur, anungji tang nungi danga amshi tenzüksü atema 'Ahsang mong' ta meyipa amshiner. Atangji, Ao osep nungbo 'asang' ta shia angur aser iba tetezüji kozüdong aser süradong mesükba süngdong ta agüja angutsü. Ajisüaka, asenok oshi nung 'asang' ta asüba ojang ya tetezü aika nung amshir asünungji, angatettsü atema aser olasü adokdang olaji tera tekaleni tudaktsü atema 'h' ji enoktsür. Iba 'Ahsang mong' ya Yisu taküm alidang Yirusalemi yimtii gado nung mener takok ngua aiba anogo bilemteta amongba anogo lir. Iba amongnü ya Yisu sür shia aruba anogo bilemteta amongba 'Easter Sunday' jakdang amongba amongnü amonger. Tetezü iba amongnü mongerbo joko taruba amongnüjibo Yisu shia aruba amongnü 'Easter Sunday' asütsü. Atangji, iba anogo dang ya shitakba agibo "Yirusalemi aiba" anogo taang janütsüka. Ajisüaka, ahsang mong (Palm Sunday) ta ajatsüsa akümba tatalokba ka asenoki Yohan tapu 12 tekong 13 nung angur. Iba anogo nung Yisu gado rongdong nung mener Yirusalemi aidang, telok tulu aruagi parnok ket nung ahsang kongsang bener, itemji ayipshia Hosanna ta ayimtena Yiru Khrista tushiba asenoki Laishiba nungji angur. Telok tulu nung nisung shiai ahsang kongsang amer ayiptena Hosanna ta ayimtenba olaji koda tulu aser tereprangtsü nung koda topur tajung sür alitsü ta ymdangi arua bilemer. Iba tatalokba nung jagi Yisu Yirusalemi takok oa aiba anogo dangji 'ahsang mong' (Palm Sunday) ta amshia amongtsü tenzü. Aji oda, tanü tashi alima ajunga nung Khristan-temi tanü ahsang mong anepdang ya yakta lokti adenshia ahsang kongsang amer yimdong süa Hosanna ta ayimtena Yisu Yirusalemi takok ngua aiba anogo bilemteta Tsüngrem tenüng sanga amonger. Honsanna tetezü "Tang kümzükan". Iba tetezü aser teimla ola ya Tenüngsang Ken 118:25-26 nung angutsü. Iba yagi asenok nem tangatetba ka agütsüba, Yisu Khrista Yirusalemi aidang Pa tenüngsanga lokti tulu adenshirtem jagi Yisui dang parnok kümzüksü ta imlaa liasü. Kechiyong Paiang Yihuda aser Rom nung yimsüsürtem den metsübi toktepa aser koka jembi. Pa dak nisung tasü nungi shia arudaktsü tashi ain liasü. Pai aneptsü aser parnok ayadanga pai chiyongdaktsü. Iba ama tashi dakji Yihuda nungertemi amang. Ajisüaka, Yisui parnok kümzüksü ta amangba tamangji parnok tanüla taküm kümzüksüba masü saka yimten nung parnok Rom nung kübok aliba talenba tia nungi kümzüksü ta Yihuda nungertem jagi amang. Iba teimla tulu nung Yihuda nungertemi adenshi. Ajisüaka, Yisu Khrista alimai arubaji Yihuda nungertem Rom nung ket nungi kümzüksü asoshi masü saka parnok Yihova Tsüngrem nungi pilar temenen jenjang nung aliba nungi kümzüksü asoshi aru. Iba jagiang, Yisui Yihuda nungertem dang nenok temulung meyipang ta tama ayimoktsü. Yisu Khrista alimai arubaji Rom yimli atsüngdoker alima nung yimsü asütsü asoshi aru masü saka Yihuda nungertem anemsü agi tenla kidang Tsüngrem külemba aser ozüng agi tetsür tanur aser sensakertem timtemdaktsüba tia nungi parnok tanüla aser taküm kümzüksü asoshi aru. Ibaji kodang asenoki jungjunga bilemdangdir, Yisu Khrista Yirusalemi aiba mapang Pa nem sü lemtsüba aser ahsang kongsang kozüka bener arua Pa nüng sanga ayimtenbaji tongtibang masü saka Pa Yirusalem tonger külen Yirusalem tenla ki agi alima rongsen bendenba tesemang ka kümer aliba ngua Pa ain adokbajang tongtibangba lir. Tanü asen tendaka asenok tenla ki ya, ashiko, alima rongsen bendenba kiang ka küma alitsüa akok. Mesüra asenok mulungjangji Tsüngren tenla ki ama masü saka anogo shia sen aser ali indang bilemba molungjangang ka dang kümadoker alitsüa akok. Tanü tendaka asenok tenladak, asen arogo aser asen taküm kibongi Yisui moatsüba aser aneptsüba indang jembia temeim mapa inyaktsü bilemer masü saka asen agitsü atema senotsü aser asen alitsüba ali kimong indang dang bilemdang, sarasademtsüa mapang mangu asenok belema alitsüa akok. Yirusalemji asen arogo, asen kibong aser asen molungjang lir. Tanü Yisu asenok dangi arur. Pa asenok dangi arudang, Pa ain madoktsüsa aser Pai tejang metangtsüba mungozünu dong atakatamba ama asenok atakatam masütsüsa asenok taküm jenjang renema lidi.

OLEMSABANG

YIRUSALEM NUNG TANU NAIA CHUBAJI NGUOGO MA!

~ Mrs. R. Mapukala, Pongen
Merangmen Tzürangkong.

Putu 20 tema süia ogo,

naia Telok tulu nongdenba ngudanger asü ?

Chuba ka, yimsüsür tulu ka kodang nübor dangi arur.

Ano-jungi nisungtem renemtepa ataba naia pilemtetdar ma?

Saka tulurji orr sülenbo jogo ama-atoker.

Kichiyong parnok tashi ulubaji tataktet ka dang.

Tanü Yirusalem nung kichi atalok ya tetamatsü ka liasü.

Akidang kodanga iba ama nisung nongdenba mungudang.

Iba anogobo mopong tanep aonba,

aser alima yimyatem palaka liasü.

Shinga süngjema melitet, süngo tu temia tepela ken

atener ama reprangtet.

Ozü sangnu ola-jia Kodak nung tenyar kensü

ola den sako aküm.

Aki tensa Gadoji tetakzü tulu keta parnoki amshi.

Ya ajemalu, tashi tanga, tangar tenzüksü renema aliba shiruru.

Teti süngjem-süngjema shinga meyirutsür.

Tanübo Yisu asoshi iba Gado-ang tongtibang aküm.

Ali mesama tashi tetshitsüsa Kibuba asoshi nüngdaka aküm.

Putu 5 dak tali lia ainkar Zakaria-i shinba ama,

Yirusalem jalatem ayimtenang, zion jala kanga pelaseta liang.

Ajemalua Gado chanu dak sanger nü dangi arur.

Yakob nungi Chuba yimli ka atoktsü,

lipok nungi alimai yongyaseta liasü.

Aji shinga masü Nazarit nungba Yisu Chubatsü indang liasü.

Reprangang-jo ! Yimdong sünga atenshir Yisu tushiba olaji.

Tsüngmok amoker medem, alia arakzüa ayimtenmeso.

Tatakrutsüsa amshiba süngo tu, koba takok,

tetushi nung nüngdak,

Ibai ayipzüa, leman nung sü lemja, " Hosana" ta Yisu tushi.

Tsüngrem tenüng nung shiba arur,

pa sangang ta tanurtemi ayimten.

Yisu sülen anidaker ajakji pa meimer dangbo masü.

Alima pa sülen ogo, Nazarit nungba dang

shingaia kichia meshitettsü.

Farasi aser sadukitemibo Pa tai aputsü pushia anidak.

Pa sülen ayimtenertem ngua, itemi arijang ta ashi.

Yisui kichi langzü itemi mekorai lira lungtem jagi ayimtentsü.

Tanü Yisu Gado nung amen, Pa amentsüsa na ajemalua lir ma?

Ajak den yimjung nung litetba tashi tanga Gado ama kümnür asü?

Yisu nü dak menra, iba akumli nung ajaki na tushitsü.

Hasana! Ta ayimtener Telok nung na-a dena ali asü.

Yisusalem nung tanü nai-a chichiba chubaji nguogo ma !

Palm Sunday temoatsü anogo Süangma.

Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir

South Africa nung America nunger pastor ka puer ao



Pastor Josh Sullivan

April 12, 2025: South Africa nung aliba Gqeberha yimti nung tekülem sentong ka nung Tsüngrem O tejembidak mapang nung mejangjaba nisung kari America nunger pastor ka puer ogo, ta osang ka ajanga metetdaksü.

Brihostibar (April 10) nikongdang Fellowship Baptist Church nung pastor, Josh Sullivan-i sayutsüngiba mapang nung nisung pezüi pa puer ao. Iba Arogo ya pa kinüngtsü, Megan tenati tentetba Arogo lir.

Aonung 7:00 ako meta prangpong amer nisung pezü Tenla ki telung jagi aitba sülen pastor puer ao.

Par kinünger, Jeremy Hall-i, "Parnoki Josh tenüng meteta liasü. Nisung pezüji Tenla ki

telungi aitba sülen mezüngbo Megan teka nung amer kishileni anir ao aser Josh dang, 'Josh, la ya nü kinüngtsü asü?' ta asüngdanga liasü. Iba sülen parnoki la nungdok aser Josh indang gari nung pa puer ao," ta metetdaksü.

Pastor Josh garijibo Tenla kidang nungi kilometer ishika dang pilar nguogo.

Tenla kidangji pastor Josh'er tanurtema liasü.

Josh aser Megan na ya Arogo tasen tenzüksür missionary tem lir. Tena South Africa nung küm tenetbuba alir. 2018 küm tena US nungi South Africa-i oa liasü.

Hopta ishika tejaklen Josh-i social media ajanga, "Kiyong nung kari timtem agütsüner aser Tenla ki

shibangdaksüner," ta metetdakja liasü.

"Lokti senden ka ayongzüka liasü aser iba senden nungji ozü Arogo aser ni anema tiyazü nung tai tongloktsü. Tiyazü nung tai tongloktsüba atema ni telangzüba agütsütsüsa aküm. Ni kanga anibelem aser jashia liasü, ajisüaka onoki Kibuba matsüngdang ajak toktsür," ta pai ashi.

Police otongdar, Andre Beetge-i, "Osangtsüsang meteter kar danga lira iba t a t a l o k b a b u s h i s ü n g d a n g b a maparen nung onok den yariteptsü akok. SAPS AGU's Det-W/O Dudley Ferreira den 082-387-5957 ajanga tongteprateptsü akok mesüra Crime Stop nung 08600-10111 ajanga tongteprateptsü akok," ta metetdaksü.

Nicaragua nung Temeshi hopta sentongtem nokdanger

April 12, 2025: Nicaragua nung sorkar ketdangsertemi Khristanem temeshi hopta (Palm Sunday nungi Easter tashi) nung sentong balala nokdangogo, ta International Christian Concern (ICC)-i metetdaksü.

2024 küm nunga temeshi hopta nung Khristanem sentong nokdangtsü atema sorkari police 4,000 nem mapa lemozüka liasü.

Nicaragua nung Tir Daniel Ortega aser pa kinüngtsü Rosaria Murillo na leniba nung sorkari linük nungi putirtem, pastor tem aser Khristan lenirtem noklang aika meindokogo, aser ibaji ajanga tang Arogo aika nung lenirtem mali.

Yaküm November ita nung sorkari nun tem danga December ita tashi nungbo linük toktsür oadokang, ta tetuyuba agüja liasü.

"Linük nung Sandinistas sorkari China nung ketdangsertemi inyakba ama inyaker," ta linük nungi meindokba opposition lenir, Felix Maradiaga-i metetdaksü.

Municipalities kar nungbo sorkari temeshi hopta sentongtem ayongzüka

agitsüa akok, ajisüaka Arogo nembo tenokdangba agütsür.

Tawa Christian Solidarity Worldwide (CSW) report ajanga ashiba agi, Nicaragua nung Khristan putirtem dang asüngdangyatsü atema hopta shia police matsüngdangi arung ta tuyuogo.

Yaküm Washington D.C nung International Religious Freedom Summit nung jembidang Nicaragua nunger putir kati, "Linük nung joko Catholic Arogo dang anünga lir," ta metetdakja liasü.

"Küm 500 tejaklen Khristan yimsü aruba sülen Arogo ka ama Nicaragua puti otsü nung mapang tamajungtibaji tang mapang ya lir," ta pai metetdakja liasü.

"Amongnü shia Catholic Arogo Tenla kimatem nung police gari anena yur mita repranger aser Amongnü tekülem sentongtem nung adenertem noksa tangokba den külemi putirtemi sayutsüngiba ji record süa ayur," ta pai metetdaksü.

Iba ama Khristanem dak tenük yoka mita reprangba ya China nung ketdangsertemi inyakba den kanga mesükteper.

Nicaragua aser China na tesendaktep kanga junga lir ajisüaka Nicaragua nungbo rongsenkettzüng jenjang kanga mejungi lir.

Nicaragua nung yimsü temeden balala anema inyakba atema 2019 küm U.S. State Department-i Nicaragua ya Special Watchlist (SWL) nung züngoka liasü aser 2022 küm Countries of Particular Concern (CPC) list nung züngokogo.

Taküm March ita nung U.S. Commission on International Religious Freedom (USCIRF)-i Nicaragua ya maneni CPC nung züngoktsü benok.

"Iba linük nung Arogo azüoktsü nükjidong nung Tir Ortega aser pa kinüngtsü nati Khristan lenirtem aika apur, tepuokdak ayur, linük nungi meindoker aser Khristanem amokmerener," ta tawa USCIRF-i metetdaksü.

Nicaragua nung meimchir temeden anema inyakba aser tamangertem anema inyakba atema UN telok kati Nicaragua sashia aitsüba sülen taküm February ita nung Nicaragua-i U.N. Human Rights Council nungi anenogo.

ANOGO ABEN TSÜNGREM DEN

TSÜNGREM O TASHI


Alima ajaki Kibubaji tsübuang; alima nung alir ajaki pa tsübudakjang. Kechiaser kodang pai jembi aji adok, pai ozüng agütsü aser kechisarena adok. T.Ken 33:8-9

Nungtugu Khristan lenirtemi Tsüngrem O tashi indang kanga tongitpang süa jembia aru. Martin Lutheri ashi, 'O dak alaka tamagitsü kechi ali? Saka kodang Tsüngremi O jembizüka yokdir, iba Oji taküm kümdaktsür.' Aser aji kanga dang shitak lir. Lipok nungi tenzüka pa O tashi ajanga anüng-ali aser yangji aliba ajongaji taküm renema lidaktsür. Ano, tesüngmangtsüji Pa O ajanga dang asenok meimchir temenen nung sür alibaji shia arudaktsütsü akok.

Tanü, asenok meimchirtemi aiben Tsüngrem O tashi ain dak mangmangteter aser mashi lenmang nung aibelena amshir. Saka ya metetdi, Tsüngrem O temeshi lir aser lung ama temulungjang takanga yimsa odaktsütsür. Anungji, Tsüngrem O bushiba, azüngba nung, aser lemsatapa nung mapang endoktsü merangdi. Maneni, Pa O tashi ain dak shitak amanga taküm kibong mulungjang shia nung iba jagi mapa inyakdaksütsü asenok tejangraba aser nükjidong südi.

Anogoshia Tsüngrem O tashi ajanga temoatsü aser taküm tasen bener arutsür, iba temoatsü agizüker tamanger ka ka südi ta ayongzüker. Amen.

Aso 3buba mapang züluba osang-tajung ken tejen ka sayaogo



April 12, 2025: Aso 3buba mapang züluba Khristan osangtajung ken ka asentenshir yanglushia sayaogo; 'The First Hymn' ta ajaba kenji küm 100 tejaklen Egypt nung aliba lisem lima nung 'papyrus' ka nung zülur angu.

Papyrus nung zülua aliba kenji shilem kar dang liasü. Iba kenji Oxford University nung yua liasü aser 2022 küm Laishiba nung mongin, John Dickson-i iba ken tanaben asentenshitsü atema inyak.

Dickson-i, "Kechiba shingaia iba ken asentenshitsü atema meinyak? Iba ken ya denominations maliba mapang nung liasü. Iba ken ya Orthodox Christian theology lir," ta ashi.

Iba ken ya Aso 3buba nung Council of Nicaea mapang nung liasü.

Iba ken asentenshitsü aser tanü putu nung Khristanem dang sayatsü atema Dickson-i nüngtugu kentener Chris Tomlin aser Ben Fielding na den longjemer inyak.

Parnoki akhidang züluba kenjang nungji kenjang tasen kar

inoksem. Iba ken ya April 11 nü saya aser April 14 nü iba dak sendakba documentary-a ka sayatsü.

'What A Beautiful Name' aser 'Mighty to Save' kentem mejemsang, Fielding-i, "Iba ama ken tejen nguteta England nung ola madoki lir, ta ni memeteti liasü. Iba ken asentenshitsü aser ibaji ajanga küm 1,800 tejaklen Khrista nung asen adianutemi atenba ama tanü Arogotem nunga kasa ken atentsü atema onok nem mapa lemozütsü," ta metetdakja liasü.

Papyrus nung zülua aliba 'The First Hymn' nung along 35 shi dang liasü, ajisüaka Dickson den Chris Tomlin aser Ben Fielding nungeri iba kenji kanga junga meyipzükogo. Iba ken ya Tebu, Techir aser Tanela Temeshi nem tenüngsang agütsüba ken lir.

Ken tetenzüklen kenjangji yamai lir, "Asenok ajaki ola madoki lidi, prangshiba petinutemi oma madoki liang. Asenoki Tebu, Techir aser Tanela Temeshi nem ken tenloktsüdang ayongtema süngjema liang."

AO OSHI ANGAZÜKDAK:**TANÜ ANGAZÜKTSÜBA OJANG****Temeküt**

(v) anasa aliba tesem, tesem telongtet (surroundings)

* Ozü ki temeküt nung asen nisung aika lir.

Temekütsü

(n) Teshibangtsü, tenembangtsü oset (cover)

* Chipa temekütsü shitoker ayutsüla.



Tir Yimyim

OLONG PAITEP # 7121

1		2				3		4		5
				6						
	7		8							
9					10			11	12	
						14	15			
			13							
16					17			18		
				19		20				
21		22								23
24										

TIPLIN

1. Saku - (4)
6. Songjen - (7)
7. Mali/Tazüng - (4)
9. Tasen apok - (6)
11. Songtem - (3)
13. Ata liasü - (5)
16. Tzünglu den külemi tsüker - (3)
17. Aso tila - (6)
20. Tashi maküm - (4)
24. Tenüng kasa jatepba - (7)
25. Ki yangluba oset - (4)

LANGTSÜNGLEN

1. Taksep - (3)
2. Langtem - (5)
3. O tamendaktak - (4)
4. Nütsü tebuba - (3)
5. Anüngdang tesangwa - (3)
6. Apitet - (5)
7. Yagi jungdaksür - (4)
8. Anogo semer ka - (3)
10. ___ tatsü - (3)
12. Tebur kidong aser zünga kasatsüngdajatepba - (4)
14. Pela agizükba tapu ka - (5)
15. Tenüng atet - (3)
18. Mejanga onü - (5)
19. Talak techira - (4)
21. Maneni - (3)
22. Nübo teyi - (3)
23. Meshi - (3)

OLONG PAITEP # 7120 TELANGZÜBA**TIPLIN :**

1. Azüng, 3. Kimen, 6. Ajok,
7. Nüngo, 9. Anen, 11. Nütsüng,
12. Azük, 13. Golab, 14. Yagi,
15. Moapu, 16. Anüng.

LANGTSÜNGLEN :

1. Atongla, 2. Nangzük, 4. Mojing,
5. Nok, 8. Osü, 9. Anüölen,
10. Nembang, 11. Nüngja, 14. Yim.

NAI-A YA METETTER MA

India nunger opening batter Shubman Gill-i Honibarnü otsü tasen ka yanglua pa ya Indian Premier League nung Gujarat Titans atema run 2000 yangluba mezüngbuba batter kümogo. Arishi küm 25 tain asayar yagi iba alizüng tongtettsü atema run 53 nüngdaka liasü aser pai Honibarnü Lucknow Super Giants den Bharat Ratna Shri



Atal Bihari Vajpayee Ekana Cricket Stadium, Lucknow nung asayaba mapang over 11buba nung run ka yanglua iba otsü tasen yangluogo. Honibarnü half century yangluba densema pai tang asaya aliba season nung half-century tanabuba yangluogo. Gill shiba 2018 küm mezüngbuba Kolkata Knight Riders nungi asaya liasü, pa IPL 2022 mega auctions magi tsüngda Gujarat Titans puri crore 8 agi alizüka liasü. GT nungi asayaba mapang mezüngbuba season pai asaya 16 nung run 483 yanglu aser parnoki asayamung akokba nung tongtibang shilem agia liasü. Tanabuba season nung pai century asem aser half-century pezü yanglua run 890 yanglu aser Orange Cap ngua liasü.

Tripura nung professor ka züka mereneshi

Agartala, Rongchii/April 12 (Agencies): Tripura nung Dhalai district kübok Longtharai Valley College nung assistant professor ka Hokolbarnü telok kati züka merenshia liasü.

Iba professor-i aibelenba ajanga kaketshr 12 parnok semester final tatidang magütsütetba sülen iba ya ataloka liasü.

Professor ya Alak Das ta jangjaogo aser pa dak college kima nisung telok kati amaba aser merenshiba indang video social media nung ayimsünga prokshiogo. Iba tatalokba ya state ajunga nung nüburtemi aitsüogo, kechiyong iba tesem nung aliba police ketdangsürtemi professor ya

küzmüka toktsütsü atema jenjang tapet magi.

Opposition CPIM-i iba tatalokba ya aitsüogo aser ashiba agi, iba ajanga Tripura nung BJP-i aniba sorkar kübok temzüng ozüng tensa tamajungba küma aoba sayur.

CPIM politburo züngsem aser Opposition lenir Jitendra Chaudhury-i Honibarnü ashiba agi, "iba tatalokba ajanga state nung educational institutions ajak indang noksa raksatsüogo. Asenoki lokti-i pei sünütsü asüba inyakyim ka süba aoba angur, koba taoba mapang mozükitem, BDO office tem nung ajangshiogo aser tang educational institution tem nung ataloker."

C h a u d h u r y - i s a ,

administration aitsüogo aser ashiba agi iba amala tatalokbatem ya ruling party-i teyari agütsüba ajanga maneni atalokyonga aoyer.

"Kaketshirtem tatidang agütsüdaksütsü aser parnok academic year küzmüka toktsütsü atema akhangtsü melenas tesayur ka yimjak nung police matsüngdang züka merenshiogo," ta pai ashi.

"Ruling party densema aliba mapangbo administration aser police-i tatalokbatem mangu ama toktsür. Temzüng ozüng chirepogo," ta paisa shisem.

Iba tatalokba ajanga tesayurtem küzmüka maliba aser lokti inyakyim azüoktsü atema ketdangsürtem shilem indang tashishiba adokogo.

Assam:Yimtsüng kati Panchayat poll nung shilem magitsü lemtet

Honibarnü Borjul-Gohorani yimtsüng nung alirtemi placards amer longka aitba mapang tangokba noksa nung angur. Parnoki taruba panchayat election nung shilem magitsü telemtetba agiba metetdaksüogo.

Guwahati, Rongchii/April 12 (Agencies): Lakhimpur district, Assam nung Dhakuakhana sub-division kübok Mornoi Gaon Panchayat anasa amenoka aliba Borjul-Gohorani yimtsüng nung alirtemi taruba Panchayat elections nung shilem magitsü telemtetba agiogo.

Local ketdangsürtemi küm aika sentoka toktsüba aser talisa yimtsüng nung infrastructure tem kanga mejungi akümba dak ajemdaker iba telemtetba ya agia liasü.

Honibarnü yimdaklirtemi

placard amer longkak aitba sentong ka ayongzüka agi aser kibong 31 dang vote magütsütsü mepeshia liasü. Longkak aitertemisa election atema nüboyimtsü asoshi political party tem yimtsüngi maitdaksütsü telemtetba agiba sangdongogo.

Parnok atema tebilemstü tulutiba kaji yimtsüng lenmang majungba ya lir, koba senzügenpong aser yimtsüng rongsenketzüng atema kanga tongtibang lir. Taoba küm pongu tsüngda aiben mepeshiaka Gaon

Panchayat-i kecha jenjang magi.

Yimtsüng nung alirtemisa Champora Bolahi ayong nung apu sentoka toktsüba süoki ia bilemba lemsatepogo, koba yimtsüng aser tesendaktep asoshi kanga tongtibang lir.

Longkak aitba temaitsü yimdaklirtemi apu anasa aser yimtsüngi ailen aser tugulen banner mesang toktsüogo, kong parnok tekhangbatem mataloktsüra election nung shilem magitsü tebilemba aliba jangja jangja metetdakja lir.

Manipur nung telungpur trok apu

Imphal, Rongchii/April 12 (Agencies): Central aser state security force tem longjemer Hokolbarnü Manipur kübok lenden nung aliba district balala meitaa aoba mapang telungpur telok balala nungi züngsem trok puogo.

State Police Control Room sangdong ka ajanga ashiba agi, Kangleipak Communist Party - People's War Group (KCP-PWG) züngsem ana Imphal East district nung tesem ka nung atsüka aliba apu. Iba den bendenloksema Kangleipak Communist Party - Noyol

group (KCP-N) züngsem ka kasa district nung par kidang puogo.

Southern Bishnupur district nung tanga meita aoba sentong ka nung sepaitemi taoba ghonda 24 tsüngda tenokdangba agütsür aliba Kanglei Yaol Kanna Lup (KYKL) telok nungi tetsür ka densema züngsem ana puogo.

Kasa mapang nung Imphal West district nung People's Revolutionary Party of Kangleipak - Progressive (Prepak-P) züngsem ka puogo. Telungpurtem ya arishi küm

22 nungi 39 tsüngda alirtem liasü aser parnok ya Imphal East, Bishnupur, aser Imphal West districts nung taoba ita ishika tsüngda ozüng alema inyaksangshiba maparen balala nung densema liasü.

Security force temi item nisungtem ket nungi tashishitsü aketba oset aika ngutetogo, kong takhangba shititem aser mobile phone trok densema liasü. Maneni bushisüngdang südar aser temzüng ozüng dak ajemdaker jenjang balala agidar, ta kasa sangdong ajanga metetdaksü.

US envoy Witkoff-i Russia Tir Putin ajuru



US special envoy Steve Witkoff-i St Petersburg nung aliba Presidential Library nung Russia Tir Vladimir Putin ajurudang tangokba noksa nung angur.

St. Petersburg, Rongchii/ April 12 (Agencies): United States Tir Donald Trump indang special envoy Steve Witkoff-i Ukraine nung rara indang jembishinütsü asoshi Saint Petersburg nung Russia Tir Vladimir Putin ajuruogo.

Trump-i Moscow aser Kyiv dang ceasefire tezüngzüktep ka agitsü ajungshia arur, saka Kremlin nungi telangzüba tajung marur. Russia aser US ketdangsürtem aiben senden amener.

Hokulbarnü state TV nung Putin-i Saint Petersburg indang presidential library nung Witkoff den salemba sayuogo aser state news agencies ajanga mapang tatsüka lir tena ghonda pezü dak tema jembishinüa liasü ta ashi.

Ukrainian settlement indang lenba-lenre balala nung rangloker

senden ya amen, ta Kremlin-i ashi.

Senden mamendang Putin aser Wikoff nati Russia leniri Trump den ajuruteptsü indanga jembitsü akok, ta Kremlin odongtar Dmitry Peskov-i shia liasü.

Küm pezü kümsük tanabuba atema US lenir tanaben White House-i January ita meyipa shilangba sülen Putin aser Trump na phone ajangabo jembir, saka ano majurutepe lir.

Arctic aser Russian rare earth minerals nung külemi sen indoktsü asoshi Russia nunger jembishinüba mapang Moscow aser Washington tsüngta jembishinüba nung Witkoff ya tongtipang nübu ka kumogo.

Izvestia news outlet ajanga video ka sayaba nung Witkoff ya yimti nung aliba hotel ka nungi

Putin indang investment envoy Kirill Dmitriev-i meiner aoba nguogo.

Ukraine nung rara tembangtsü asoshi jembishinüba nung telemtetba tajung kati maruteti anendaka aliba mapang US-i ceasefire tezüngzüktep ka yanglutsü asoshi meranga inyaker.

Taoba ita US-Ukraine lungjemer ceasefire atema proposal ka benokba Putin-i magizük.

Russia aser Ukraine nati energy infrastructure nung amakba anentsü ta March ita mulungtepaka ano maneni amaker ta kati ka dak tai tongloksüteper.

Putin-i Ukraine Tir Volodymyr Zelenskyy lenisüba ya par nüburtemi mulungba masü ta aitsüba sülen March ita tatemlen Trump kanga jashia ain adokba lemsatep.

NBC News den sensaksemba mapang Ukraine nung azüdokshi anentsü atema tezüngzüktep ka neyanglutetara aser ibaji Russia tai ta ni bilemra, Russia nunger totzü nung tariff meshitsü, ta Trump-i amokmerena liasü.

Hokulbarnep Trump-i pa indang Truth Social sapang nung, "Russia-i yimjung atema inyaksüla. Nisung tali asür, hopta ka nung meyrirjang junga asür. Ni tir ka asü asüba iba rara ya metenzükla!!!" ta ashi.

MOLUNG NEN O



Aso:
01-05-1925

Asü:
03-04-2025

ASÜR ALEMSONGLA

Teti dang meima aliba tetsü tajung asür ALEMSONGLA (Chuchuyimlang) akümlir wadang tembanger iba alima nungi pila aoba mapang onok mulungzürep mangyim tia nung alidang temeimer ana aser talang nungi Kija, Kibong, Kiyonger, Arogo, Sensosanger, Yimden, Medemsor aser lokti balalai ozü den nübu, rongsen aser tamang nüktzü tenla jenti agi lenla ajak nungi onok den yaritepa asoshi ajak dang kangasa pelaba iba zülü ajanga lemsateper. Asen tulusang Tsüngremi nenok ajak dang moajangni ta ozü Sarasadem.

~ Temeim Chirnur, Anükapang, Semchir aser Kinungertem.

ALI TAYOKTSÜ LIR

1. 3 Pura. Foothill road tangshia 150 per sq.ft
2. Foothill anasa teak lu, 120 per sq.ft
3. Showuba fly over anasa 190 / 250 / 310 per sq.ft

~ Contact : 9863826159

Ceasefire raksaba sülen Gaza nung tanur 500 shi tepsetogo

Gaza City, Rongchii/April 12 (Agencies): Taoba ita Israel-i Hamas den ceasefire yanglua aliba raksar Gaza nung maneni Israel-i tayimtsü amshia aser bomb poklokja amakba nung Palestine nunger tanur 500 shi tepsetogo, ta Gaza Civil Defence indang odongtar Mahmoud Basal-i ashi aser UN ketdangsür katia rara agi raksatsür aliba tesem ya "post-apocalyptic killing zone" ka mesüker ta ashi.

Ano maneni Israel-i tayimtsü amshia Gaza nung Honibarnü amakba nunga tanur ka densema nisung trok tepset, anungji tesüba ghonda 24 tsüngta iba linük nung asür nisung 20 dak tema kumogo. Israel-i March 18 nungi asendenshir Gaza nung bomb poklokja amakdang nisung 1,500 dak tema tepsetogo, ta Palestinian Ministry of Health ajanga ashir.

Israel-i Gaza indang Tuffah kiyong nung Honibarnü amakdang nisung ana tepset aser tanur ana yiru aser ano Gaza north tsütsü Beit Lahiya kübok al-Atatra district nunga nisung ana tepset.

Ano Khan Younis south tsütsü Qizan an-Najjar tesem nung Israel-i drone amshia amakba nunga Palestine nunger ka tepset.

Maneni Khan Younis anüolen al-Mawasi area nung civilian tem jenoka aliba süki nung Israel-i tayimtsü amshia amakba nunga asü-amaba jenti lir, koba Israel-i "safe zone" ta sangdonga lir.

Deir el-Balah nung aliba Al-Ahli Hospital kima nungi osangbener kati ashiba agi, Sham ta sür kinü tanur ka lar kibong alidak amakba sülen kanga sashia yiru.

"La kangasa sashia yirua la teka rangdok aser ghonda ishika lir la asü, kechiaser doctor temi la meyaritet," ta osangbeneri ashi. Sham asüba ajanga Honibarnep asür nisung trok

junger liasü.

Honibarnü Shujayea aser Khan Younis nung 'forced evacuation orders' ana agütsü, ta osangbeneri ashi.

"Palestine nungeri parnoki kileni aotsüar memetet."

UN High Commissioner for Human Rights indang odongtar Ravina Shamdasani-i Hokulbarnü ashiba agi, Israel-i Gaza nung March 18 aser April 9 tsüngta amakba tejangja bendenba 224 nungi 36 nungbo tetsür aser tanur kisung asü.

UN agency for Palestinian refugees (UNRWA) chief Philippe Lazzarini-i osangbener den jembidang Gaza nung tensa ya "post-apocalyptic killing zone" amai lir ta ashi.

Hokulbarnü Türkiye nung Antalya Diplomacy Forum nung jembidang, Israel-i international law nung aibelen Gaza telungi chiyongtsü, totzü, mozü aser danga tongtipang teyari bener aiba nokdanger, ta Lazzarini-i nenshia ashi.

UNRWA Director of Communications Juliette Touma-ia Honibarnü social media X nung post ka lemsatepba nung, Gaza nung nungdakba supplies ajunga agimar, ta shia liasü.

"Kinü tanur aser tila tanurtem yaseta mejanger."

Israel-i ano maneni mitkar tashi amshia amaktsü nangzük aser ketdangsür temi Gaza south tsütsü alinük tasen rakzüktsü sentong lemsatep aser 'forced evacuation orders' aika agüja liasü.

March 18 nü ceasefire tembangba sülen Gaza nung Palestine nunger 400,000 dak tema tesem balala nung jenshia lir, ta UNRWA ajanga ashir. Israel-i October 7, 2023 nü rara tenzükba sülen Gaza nütsüng yongsük million 2.3 aliba nungi shilem 90 shi tashiyim amshia tesem balalai arishi. Palestine nunger 50,000 dak tema tepsetogo aser 115,981 yiruogo ta rights groups temi ashir.

national health authority

Ayushman Bharat Health Account (ABHA)

Ayushman Bharat Health Account or ABHA is a 14-digit unique health identifier number.

ABHA Banao Digital Ho Jao!

Scan the QR code to create ABHA

OR visit abha.abdm.gov.in

- 1 Click on 'Create ABHA number'
- 2 Generate ABHA using Aadhaar
- 3 Authenticate Aadhaar and Mobile number using OTP*
- 4 Create ABHA address
- 5 Click on submit to generate your ABHA and download it

*In case your mobile number is not linked with Aadhaar, You can visit the nearest ABDM registered health facility to create ABHA by biometric authentication instead of OTP.

How will ABHA benefit you?

Health Records Anytime Anywhere
Store your health records digitally so that you can access and share as required

Easy Access
Get easy access to services from registered health service providers

Paperless Process
Get your health information like lab reports, doctor prescriptions etc. digitally

Teleconsultation
Avail teleconsultation from verified healthcare professionals

Freedom from Queues
Book online appointments and get queue-less OPD visit facility

AYUSHMAN BHARAT DIGITAL MISSION || DEPARTMENT OF HEALTH & FAMILY WELFARE GOVERNMENT OF NAGALAND

Helpline: 14477 (Toll Free) | abdm.gov.in | [AyushmanNHA](https://www.AyushmanNHA.org) | [@AyushmanNHA](https://www.AyushmanNHA.org) | [@AyushmanNHA](https://www.AyushmanNHA.org) | [@AyushmanNHA](https://www.AyushmanNHA.org)

6 buba 35+ Mokokchung Football League tenzuka asayadagi



Tanü 6 buba 35+ Mokokchung Football League tenzükba sentong nung tongti tejaoker Mokokchung Municipal Council, Councillor Wb. Imkongsanen aser mezüngbuba asaya Wasang FC aser Nova SC asayartem aser achaayangertem külemi tangokba noksa.

Mokokchung, Rongchii/ April 12(TYO): 6 buba 35+ Mokokchung Football League tanu Astro Football Turf Ungma nung kanga dang meraketa tenzükogo.

Tanu mezüngbuba asaya Wasang FC aser Nova SC tsüngda asayaba nung Wasang FC telok nungi T a k o s ü n e p , C h u b a Imchen, Chubayanger, Jamonger aser Nükshi parnoki goal kaka agütsü aser Nova SC teloki goal kata magütsütet nung Wasang FC teloki goal 6-0 agi Nova telok ayong ayonga akok.

Tanabuba asaya Trebuchet FC aser Terokroker FC

tsüngda asayaba nung Trebuchet FC nungi Repamayang-i minute 59 buba nung goal-1 yokteta iba goal kija jagi Trebuchet FC teloki Terokroker telok koka liasü.

Kasa anogosa tasembuba asaya New Ecclessia FC aser Revenant FC asaya aser iba asaya nung asaya tenzükli minute 2 buba nung New Ecclessia FC telok nungi Nükshibai goal-1 yok saka asayayonga aodang minute 20 buba nung Revenant FC telok nungi Rongsenchiba-i goal-1 yokteta telok ana kasasa akum sakasa minute 59 buba nung New Ecclessia FC telok nungi

Moatemsü-i goal-1 yoktet nung New Ecclessia FC teloki goal 2-1 agi Revenant telok akok.

Tanu iba asayamong tenzükba nüngtem sentong nung tongti tejaoker Mokokchung Municipal Council, Councillor Wb. Imkongsanen-i mapang tatsüka agia tayongzükba o jembi aser Tiasola-i ken tajung ka atenba den 35+ MFL convenor Aongsen Aier-i tarur aser asayartem pelaa agizüka jembi, Temsutoshi Lkr-i Tsüngrem lenisüba jazüka sarasademer sentong tenzük aser Dr. Imlinichet lenisüba nung iba sentong agia liasü.

IPL 2025: Glenn Phillips tanungba asayatem nung masayatetsü

Rongchii/April 12, 2025 (Agencies): New Zealand nunger all-rounder Glenn Phillips, Gujarat Titans' pur Sunrisers Hyderabad den asayaba mapang groin yiruba sülen 2025 küm IPL nung tanungba asayatem nung masayatetsüsa kümogo.

Gujarat Titans' nungi pacer Kagiso Rabada jirula maparen kar aliba ajanga asaya ana dang asayaba sülen kidangi meyipa or lia tang Phillips yiruba ajanga GT pur kanga akoksaogo.

Phillips, shibai tang asaya aliba season nung GT nungi khen danga masayai liasü, pa boundary ka kümzüksü

merangba mapang yirua liasü. Arishi küm 28 tain asayar ya 2025 küm IPL ya khen danga masaya tsüngda tembangogo.

Gujarat Titans puri iba tatalokba dak sendakba nung osang ka agütsüogo. "Glenn takartiba nung taneptsü angutsü Gujarat Titans puri imlaja atar," ta club sangdong ka ajanga metetdaksü.

Tang yiruba ya Phillips asoshi kanga tezüdangtsüka asütsü, shibai Champions Trophy nungi New Zealand tenüng nungi asayaba mapang fielding kanga junga mena nüngtugu küma liasü. Iba den külemi pa batter tajung ka lir anungji taküm IPL nung pai temelenshi

adokdaksütsü imla liasü.

Titans pur taküm IPL kanga junga tenzükogo. Top-order batter Sai Sudharsan, captain Shubman Gill, aser Jos Buttler nungeri kanga junga asaya arudar, saka Phillips' masayatetsüsa akümba ajanga substitute tashi meiti küm daksüogo.

Team nung asayar tajung aika liaka Phillips' tugatokba ya GT asoshi tebilemtsüka asütsü, kechiyong mapang tatsüka tsüngda international asayar ana masayatetsüsa kümogo aser iba ajanga IPL nung tanungba asayatem atema parnok tasa dak kongshitsü akok.



Nagaland Sepaktakraw tetsür aser tebur team 68buba National School Games (2024-25) nung shilem agitsü. Iba asayamong ya School Games Federation of India tawabangba kübok Directorate of Youth Affairs & Sports Manipur-i ayongzükba April 15 nungi 21 tashi Imphal nung asayatsü.

3buba Longleng Inter-Departmental asayamong tembangogo

Dimapur, Rongchii/April 12 (TYO): 3buba Longleng District Inter-Departmental Tournament April 10 nü indoor badminton stadium Longleng nung tembangogo. Asayamong shibangba sentong nung Phom Peoples Council (PPC) tir Y.B. Angam Phomalakteta jaoker liasü.

Sentong nung o jembiba mapang alakteta jaokeri, saisabong ya asaya ka dang masü saka iba ajanga asenok nem teamwork, yimayimpong azüoktsü, aremzüksü, shitemang aser tekelok shisatsü terenlok asoshi inyaksü tangazükba agütsür, ta ashi.

Ajak senteper iba asayamong nung Departments 40-i shilem agia liasü. 3buba Inter-Departmental Tournament 2025 overall champion ji 12th NAP IR BN Chingtok liasü aser School Education Department tanabuba jenjang nung liasü.

Sentong nung organising committee tenüng nung EE, PWD Longleng, Er. S.B. Angh-i o tatsüka jembi aser St. Joseph High School Longleng nungi kaketshirtemi special presentation ka agüja liasü.

Sentong nungsa DLRSO Longleng, Imtiyanger Imsong-i tepela o jembi aser iba sentong ya Forest Ranger Longleng, Chepeu Koza lenisüba nung agia liasü. Kasa mapang nung Pastor Police Baptist Church, Chingthai Phom-i tenütsang agüja sarasadem.

Asayamong nung tebur badminton asaya 12th NAP IR Chongtok-i akok aser School Education Department tanabuba jenjang nung liasü. Tarep temeyoktep asaya nung School Education aser Bautung Higher Secondary School na mezüngbuba aser tanabuba jenjang nung liasü.

Tebur Table Tennis kija asaya Department of Forest & Climate Change-i akok aser Agriculture Department tanabuba nung liasü. TT tetsür kija asaya DEF Longleng-i akok aser School Education Department tanabuba jenjang nung liasü.

Tebur Carrom board tarep asaya nung 12th NAP IR aser Sub-Treasury Longleng na mezüngbuba aser tanabuba jenjang nung liasü. Tetsür asaya DEF Longleng-i akok aser District Administration tanabuba liasü.

Tebur penalty shootout 12th NAP, IR-i akok aser School Education Department runners-up liasü. Tetsür penalty shootout nung School Education Department aser District Administration na mezüngbuba aser tanabuba liasü.

Air rifle shooting tebur asaya PHED-i akok aser Youth Resource & Sports tanabuba liasü. tetsürtem asaya Bautung Higher Secondary School-i akok aser Medical Department tanabuba jenjang nung liasü.

AIFF-i AFC Asian Cup atema bid asüba Mansukh-i pusemer

Rongchii/April 12, 2025 (Agencies): Sports Minister Mansukh Mandaviya-i Honibarnü sangdong ka ajanga, 2031 AFC Asian Cup atema India-i bid asüba sorkari pusemer ta shiogo. Paisa, asayamong tongtibang ka ayongzükba asayaba ajanga linük jenjang tajungba küm daksütsü kechiyong linük nung 2036 Olympics ayongzükba asayatsü nükjidong lir.

All India Football Federation (AIFF)-i, March 31 nü tatembangbuba anogo matong tsüngda 2031 AFC Asian Cup ayongzükba asayatsü atema 'Expression of Interest (EoI)' benokogo koba Hokolbarnü sangdonga liasü.

"Asayamong tongtibang ka ayongzükba asayaba ajanga linük sports ecosystem aser infrastructure mapang talangka atema jenjang junga toktsür. Saisabong ajanga alima nung India jenjang junga akümba kuli agütsütetsü," ta Mandaviya-i ashi.

"Ato kilonser Narendra Modi-i anir 2036 Olympics ayongzükba asyatsü atema bid südar. Ano India nung Commonwealth Games ayongzükba asayatsü tejangraba tali küm daksü," ta pai ashi.

Sorkari teyari agütsütsü ta shia Mandaviya-i, "linük nung

football asaya kanga nüngtugu kümogo anungji AFC Asian Cup ayongzükba asayatsü atema maongka bushitsü ya timdang."

"India-i Asia nung football asayamong tulutiba bener arutsü atema All India Football Federation-i bid asüba sorkari nongiter. Takok ngutetra football asaya kanga renloktsü ta ni temulung lema bilemer," ta pai ashi.

2031 küm iba asayamong ayongzükba asayatsü atema India den ano Australia, South Korea aser United Arab Emirates nungeria tejangraba aliba sayuogo.

Indonesia aser Kuwait natia EoI benokogo aser Kyrgyzstan, Tajikistan aser Uzbekistan nunger longjemer bid ka benokogo.

India-i iba asayamong ya khen danga ayongzükba asaya mali. Parnoki Praful Patel AIFF tir asüba mapang 2023 aser 2027 edition ayongzüksü atema bid süa liasü.

2023 atema bid asüba ya 2018 küm agin aser 2027 atema bid asüba-a agina liasü. Kalyan Chaubey-i AIFF tir mapa agizükba sülen ita ishika lir 2022 küm December ita India-i 2027 AFC Asian Cup ayongzükba asayatsü bid asüba agina liasü aser ashiba agi, tang iba amala asayamong tulu ka ayongzükba asayatsü sentong nung mali.

BILEMDANGANG

"Nai ochi dang jembira kecha
bilemtetshitsü nüngdak madoker."